

四庫全書

集部

欽定四庫全書

陶學士集卷十

明 陶安 撰

歌

大明鏡歌鼓吹曲

自古帝王之興必有著述以紀其盛若唐臣柳宗元作  
鏡歌鼓吹曲所以載祖宗之功能是已肆惟我聖皇興  
自畎畝務行王道不十年遂有天下豐功偉烈博侔天  
地臣安忝侍從親覩大戰於彭蠡湖雖鬼神莫測其機

爰勦叛孽全師而歸其後命將出師往無不克臣不文  
然以筆硯是職謹用宗元所名而弗遵其制摠爲三闕  
日出師曰奏捷曰凱旋俾兵旅歌以爲容且伸其意所  
以稱頌功德之盛於無窮爾

皇天眷有德聖君起臨濠定鼎向建業夷夏胥來朝蠢  
哉爾醜猶負固蟻聚鴟張敢侵侮聖慮憂及民雷霆赫  
斯怒爰整師旅江之東戎衣一着親元戎威勢雄爪牙  
奮勇武鐵貫千櫟幢結陣兩戰酣海濤沸天風六時不

解屠戮莫可算鄱陽湘水皆凝紅俄飛一流矢酋首先  
殪凶千古竒遇成神功天討有罪繇天衷左肅從此還  
當廷命將帥桓桓諸虎臣分符出討罪平吳定浙及閩  
中陝關魯蜀威無外肅天兵塵不驚長驅抵燕城望風  
披靡如拉朽一掃海宇腥羶清王道蕩蕩邦家寧從此  
天下萬年歌太平 右出師

皇仁憫弔生靈辜與師伐叛鄱陽湖左肅親將兵百萬  
旌旗蔽天連舳艫况茲將帥皆貔虎攄竭忠誠奮威武

龍蛇起陸開關機，狹狹磨牙互吞吐。聲揚似雷霆，氣聚  
若雲靄。勢擁山排空，威肆濤翻海。大地總掀簸，白日失  
光彩。交鋒結陣兩酣戰，血濺長江赭波面。殲劉贊，猛過  
刈麻俄報渠魁殪。飛箭轅門獲醜五萬多，魏魏黃鉞還  
鑿坡。攬槍淨掃大懟息，洗兵就欲傾天河。其餘吳閩猶  
倚角，馘虜那能抗喬嶽。浙齊蜀陝諸翹芽，烏敢萌纖傲  
霜電。元臣廷受命，出則奏捷功。長驅到燕薊，載籍歸天  
宮。際遇風雲數豪傑，到處烟塵皆撲滅。十年睿筭承丕

烈天意人心搃忻悅 右奏捷

興臨濠都建康風雲從神龍翔川嶽簸蕩乾坤低昂掃  
腥羶正紀綱岷受墊僉聖皇天與人歸戡四方如日升

天萬物光 一解 戰江漢屠鯨鯢仗黃鉞秉白麾奮義威

專天機百辟趨虎與羆太白冥天狼隳摧彼鱗鬣流成  
漪江漢平萬乘歸 二解 諸爪牙靖東吳剪兩浙甌閩區

刃弗剗衄全師徒踴躍歡呼吾廟獻俘幅負廣黔黎蘇  
三解 桓桓碓伐山東狐鼠輩競潛蹤隴右蜀西諸鞠兇

難刈若斷蓬烽火息狼烟空

四解

遂北指赤狄直抵幽

燕境旂旄央央來彼竄滅形影陽九值時數中原弗遑  
靜百年今復清干戈氣全屏廣輪際天海輿圖屬統領  
無思不臣服萬古鎮悠永

五解

右凱旋

重登鳳凰臺獻歌奉進時歲丙午剪除群兇殆

盡喜而有作

已擣狐兔窟重登鳳凰臺鳳凰臺上聖人作淨掃六合  
無纖埃白日出青天開煙霏無留痕曠蕩盡九垓但見

紫金之山高崔巍長江萬里奔駛朝宗來朝宗來皇圖  
恢握乾鎮坤妙斡璇樞回大哉造化仁淳淳雨露滋枯  
槁摠甦醒烝黎樂雍熙樂雍熙咸梯航聖人陞大寶端  
冕蒞四方神基永固天同長地同久天同長聖人萬壽  
延無疆高臺覽德來鳳凰

駕幸獅子山應制

聖皇應天運出以安民生撥亂反之正仁敷臻泰寧十  
年天下一刻平紀年定鼎開神京城西有山極竒峻昂



昂雄峙長江汀其山儼若狻猊形百獸仰伏皆來庭江  
流其下赴朝宗洶湧昕夕弗少停法駕時幸臨乃以觀  
民風體民情匪爲逸樂無事而空行峯巒虎兕奔波浪  
虹霓騰風帆烟舶商旅互來往秧疇麥畛農父方耘耕  
雲霞舒卷芷杜青森羅萬象皆來呈重瞳顧眄值晴霽  
謂此景界由天成用賜此山號獅子昭示堅久無窮名  
吁祥麟出瑞鳳鳴四海爲一家於穆皇風清肇造勤禮  
樂興順游豫恢綱紘武多牙爪文誠股肱登臺陋漢高

思士發歌聲乾道復何爲  
貽謀千萬齡

奉旨賀平章鄧遇等諸將平定中原回

大明受命眷自天如日上升照八埏  
帝皇德業際穹壤  
在古無後今無前烽烟到處咸撲滅  
無強不摧堅不折  
中原開拓尤掛念睿謀選將當庭闕  
桓桓羆虎智且雄  
鳥翔蛇蟠排折衝戰機陣勢指掌握  
神鬼捍闔風雲從  
雷霆轟天震笳鼓號令嚴明整行伍  
統師百萬辭玉京  
天塹須臾捷飛渡蔡淮小醜不足平  
齊魯妖孽難逃生

長驅汴洛煩一掃直取圖籍投燕城千軍倒戈彊敵避  
根株既拔連條肆乃收晉冀廣幅負更納秦關貢租稅  
朔漠已靖遼海寧奏凱還朝塵弗驚龍顏霽豫衆復命  
白日上貫皆忠誠止有蜀黔何慕爾一箭飛臨猶可弛  
生民安樂頌太平萬萬年呼聖天子

閩中王指揮報捷來金陵就送其歸

跨錦鞵佩龍泉豹弣鳴鏑懸玉玦鈎重弦手提髑髏血  
連連走報捷音丹陛前見殺賊酋長天顏喜回春溢盎

金幣出內帑三級崇資併加賞亟還撫輯要解民煩寃  
毋徒誅夷有乖優恤息

壽宣國李公

月當秋九屬陽敷懸弧佳辰值初度欣從真龍飛上淮  
五岳生靈共環覩神化見田隨躍淵轟雷掣電開風烟  
長江浪濶竟飛渡甘雨灑徧東南天輔佐聖皇開九有  
淨掃攬搶扳北斗或行拓境仗節鉞或任經邦陳可否  
建都控臨佳麗地沙隄火城崇勢位十年黃閣尚清高

吳楚峯巒挹蒼翠河山帶礪誓始終金書鐵券昭全功  
股肱元首重今昔奚特殿陛誇孤忠開國承家華第宅  
厚錫珍饈列瑤席獸爐青裊水沉香瓊卮紅瀉流霞液  
嘗聞大椿竒論自莊周八千歲爲春八十歲爲秋願公  
永與椿相伴又聞瑤池有桃仙所植三十年開花三千  
年結實願公此桃頻得食更願夙興夜寐事一人啟土  
臣鄰魚水親謨明迪德並堯舜天下仁壽同享熙熙春

石假山歌

世上好山如好人，睨傲不肯來相親。是何峯巒落几案，  
數寸氣象排蒼旻。我聞好山芙蓉三十六，從有鴻濛露  
巖谷一宵神。運霹靂斧，但見二十四峯青立玉，翻然飛  
去十二峯來向。君家伴幽獨，忽遇雲間騎鶴侶。爲言此  
事非誇誦，更有仙家十二樓。化作游龍渡江去，硯屏時  
映一拳小。萬壑千巖共昏曉，天地骨含千古清。收拾精  
神不爲小洞天，兩竅祕莫窺虛冥。眇漠涵天池，須彌亦  
向芥子納。靜中觀妙生，神奇幽人拂拭愛。蕭洒掌握烟

霏恣陶寫着屐不勞追謝公山同心會忘真假

望夫山

春風江頭吹柳枝閨中佳人怨別離長城烟草渺天北  
重見郎面知何時欲飛向君無羽翮登山望遠雙瞳碧  
寸心似石無轉移遍體隨之槌成石相思誓與天地久  
肌骨猶香堅不朽征夫飄泊終不歸縱活孤幃難獨守  
岫花紅簪螺髻綠雨露朝昏足膏沐銀河雲錦織衣裳  
月光爲鏡天爲屋嗚呼六朝重鎮姑孰城前後藩臣來

駐兵爲臣不忠取屠醢何如貞女身長在

天門山曲

混沌未鑿元氣閉帝遣斲開雙闕麗一抽鍵鑰不復扃  
彷彿閭闔當雲際岷波如絲來自西狂飈忽駕滔天勢  
雷驅銀馬蹴兩涯虎豹遁藏闔者逝向年未曾到此山  
遙望不知誰抱關但見烟蒼雨黛動顰咲畫出八字宮  
眉彎春來堤柳青裊娜二梁開顏忽招我一在淮西一  
江左夾我詩船船不過船壓天光覺天墮愛惜玻璃才



能唾舉杯對月嚼冰玉桂香萬斛清胃腹夜檄江妃舞  
長袖爲君翻作天門曲憶昔充貢兩赴京九重宸啟瞻  
彤庭懷策空歸名不薦五門微茫夢中見

凌歊臺

炎歊苦鬱蒸何處堪欺凌黃山古臺址峻業何層層周  
覽無不極我嘗試一登湘潭巴蜀總在目長江濤浪來  
如崩縈迴一帶繞雲漢天門對立青峻嶒果然暑氣無  
地着松陰六月凝寒水所以凌歊名不誣世所稱想昔

宋主卜築時工匠庶黎勞聿興瑤塔沓錦具金雀棲觚  
稜教成粉黛歌白紵吹彈絃管聲嬌騰無何豪華逐流  
水轉眼衰歇茫無徵惟餘清泉白石散林壑雨綠莓苔  
鋪氍毹銷磨今古罔識榮與辱長年只有山中僧

弔虞雍公廟

趙宋累十葉南渡紹興時金主長驅百萬師兩淮宵遁  
權與錡駕欲航海社稷危麾艘絕江來氣已吞采石顯  
忠期不至事勢倉皇急參謀本儒生剝床痛憂國立招

諸將赴海鮑蹴舞雙刀陣中出六軍奮勇殊死敵盡艦  
衝渠半沉溺復追射敗之僵尸四千餘公親再奏捷露  
布獻首俘隨復縱火蕩巢穴敵亦含羞燒鳳車江東西  
遂寧謚口碑永頌神功德當時微公那能免災厄生民  
立廟沙渚傍補報四時陳血食只今風塵障日昏想公  
英氣猶生存咸懷我公不暫舍堂陞再拜奠酒尊安得  
如公者復見生斯世慰安黎庶清乾坤於乎安得如公  
者慰安黎庶清乾坤

月蝕次韻張誠之

誰使妖蟆心慘刻，玉宇瓊樓恣吞蝕。  
兔老蟾癡不及走，天地須臾變昏黑。  
玉川子彷徨於中庭，涕泗成窵號臣。  
雖有寸鐵無由身，撮天梯高但見龍窟隱。  
頭角虎衛伏牙爪，龜鳥睨視窈無策。  
金鼓震地空怵怵，夜闌還我爛銀色。  
天眼如何能瞽得，飛章遙賀廣寒宮。  
皓乘流空照箕翼，下界百萬億蒼生永仰清光保無斁。

送靜明復住持天宮寺

宋宗室乃  
講僧也

靜明復毓秀乎儒族茲乃膜拜緇其服終日緇經坐空  
谷君不見龍飛鳳舞下天目烟草淒涼渺平陸江南玉  
樹寂無舞喜見曇花艷西竺月影相隨湖上宿曉玩雲  
樓衆山綠苑鹿晝馴巖虎伏飯飽青精蔭脩竹空外一  
聲清唄響寶床演法毫光燭蓮香飛出齒牙間天雨易  
陀散珠玉聞道天宮現人世蒼鷲回環梵王屋一朝教  
省檄書來主領名山起幽獨釋子遙聞大歡喜仰待雲  
間錫飛速從今禮師如禮佛丈室天龍來眷屬但令宗

說兩通融選佛場中一燈續

雲樓地名

樵隱歌

并引

溧川端國用卜築巉山自號樵隱其子以善能揚父德  
託陳子良來求樵隱之文余亦樵于楚山者也聞端君  
之隱喜動於懷走賦長歌或乃鋸清風斧明月憇叢薄  
以抒情招烟霞以爲侶蒼童白丁扶携後先譜斯歌以  
唱和之亦山中之真樂也

隱君家住巉山麓託興樵蘇生計足得柴既可編爲門

伐木還能結成屋身穿巉山雲春融草樹榮欣欣篔簹披  
巉山雨翠濕條枚漸翹楚西風飛霜天又雪忽見滿山  
黃葉脫童子相隨采薪去斤斧丁丁在林樾下山笛弄  
三兩聲檐頭風月生餘馨到家一事滿人意咲指瓦竈  
炊烟青逃名物外絕幽雅厭看市塵飛野馬平生挺挺  
松柏姿豈同泛泛芻蕘者君不見朝官待漏水凝履寒  
透鸛貂侵骨髓何如取將楮杵煨滿爐暖襲圍屏晨未  
起又不見豪家過冬徧費錢衣重錦綉榻重檀何如斫

得桑榆燒作火團欒兒女如添綿更有酒樓歌髻整狂  
容沉酣呼不醒不及我樵安靜境澗底青荆沸茶鼎復  
有爵高多俸祿巧覓資財饜魚肉不及我樵心寡欲手  
束乾柴煮齋粥久無買臣富貴心列壑層巒留賞音清  
猿攀蘿同晝暇黃鸝求友聞春吟巢枝小天地爛柯短  
古今戴雲冠今月在襟白石爲桃蒼霞衾左招農叟右  
招牧亦有漁父相追尋長歌未歸藉瑶草采芝又遇商  
山老松花釀醪顏色好夢魂飛上蓬萊島



五花馬

五花馬雪蹀驕春赤雲胯前年來從冀北野蹄不驚塵  
汗流赭將軍見馬筋骨奇不惜千金買得之持韁使馬  
或徐疾馬不能言意自知騎向邊城頻出戰背長鞍花  
肩著箭敵兵四合突重圍救出將軍走如電將軍歸向  
馬拜謝汝龍駒脫吾害芻如山豆滿倉牧人守飼寒夜  
長帳下英賢籌畫妙曾勸將軍勿輕躁智謀仁勇勝萬  
人破敵擒王獻宗廟將軍早依如此語免致冒險幾成

虜感恩在馬不在賢但恐忠良氣消沮養馬能利將軍  
身養賢均利天下民若能養賢如養馬偃武脩文治道  
新

河如帶

虎有爪鵬有翼爪擒猛獸威愈張翼奮高雲身起疾自  
從軹道釋降王火旗龍馬趨咸陽丞相淮陰文武並良  
平片舌摧彊梁開國功臣定王霸捲除虐網民歸化壺  
關仁義決雌雄馬上安能得天下且如吏才世常有何

亡如失左右手儻非神計六出奇空陷滎陽虎狼口長  
樂置酒朝儀新天子之尊世一人元勳雖是稱三傑鴻  
業皆由得衆臣臣有才君所倚元首股肱爲一體家國  
逸興每因此若使虎無爪兮鵬無翼橫飛怒搏將何以  
狐兔鷓鴣等焉爾高皇念功能重酬剖符裂土封諸侯  
刑白馬宣盟辭告於上下之神祇神祇洋洋明鑒知盟  
若曰山如礪河如帶地老天荒國長在河如帶山如礪  
子子孫孫千百世鐵爲券丹爲書視彼竹帛堅有餘金

作匱石作室藏之宗廟何深密分茅食邑布州郡雉粉  
衣裳龜紐印謝恩鳳闕拜且言長與漢室爲藩垣後來  
疑忌含怒怨激得王侯屢生變戮豨醢越夷韓族請苑  
利民翻繫獄漸次國除真可憐幾家能得傳曾玄口血  
未乾言自食無怪殘刑有武宣爭如待下推恩德保全  
功臣扶社稷周家雖不誓山河國與諸侯綿八百君心  
誠信能確守帶礪不盟天亦祐君心誠信苟有虧帶礪  
雖盟終自欺君不見呂后在前莽操後還賴功臣同拯

救河流山峙尚依然不似人心不長久

澗底松

兩崖峭立夾幽澗澗底長松生直幹崖高澗低無路通  
鐵骨霜鱗有誰者托根若在徂徠野千尺良材逢匠者  
拔爲梁棟登廟堂豈容偃蹇山林下澗底松安可賤地  
位雖卑獨無怨不願用於漢家未央宮不願用於唐室  
含元殿久無帝舜作巖廊甘分沉淪羞賈衍自從長養  
數百年絕彼斤斧全吾天未央含元雖壯麗回首瓦礫

凄寒煙君不見犧尊青黃木之灾至寶不琢真竒哉

大風起

大風起大風起掃蕩烟塵淨如洗火龍吹燄成赤雲鼓  
鑄乾坤又一新鸞旗豹車過沛里父老子弟爭迎喜向  
年離家纔庶民今日還鄉是天子酒酣情濃思故舊慷  
慨悲嗟舞長袖復除戶戶動歡聲千秋萬歲君王壽杜  
哉親唱大風歌金石鏗轟奈樂何君不見拔山蓋世骨  
先朽何在威加訖雄赴又不見深室懸鐘烹走狗何用

猛士爲之守大風起兮雲飛揚不如膏雨流滂滂威加  
海內歸故鄉不如帝德天下光安得猛士守四方不如  
王佐之才登廟堂所以漢道不克承三王

應制次韻石城秦淮二首

石頭城與雲平朝見紫霞結暮見明月生城邊年年春  
信早御溝漲暖垂楊青駐馬坡前花雨歇江北浮舟渡  
桃葉中營兵筭朗如月鍊石尤能補天缺氣運推移夜  
還晝六代繁華應復舊秦淮水息風浪宛如河漢向西

流星斗高環紫垣上祖龍鑿山氣常王地脉仍完秦自  
喪大帝興吳天塹雄五馬南浮形勢壯秦淮光涵天影  
明樓臺夾岸如承平雪晴朝來春水生且無江上鯨鯢  
爭鍾山萬古色不改日出雲開見滄海

賦

大成樂賦

芹波環鑿芝楹毓金素王凝旒有赫其臨肅成均之巖  
祀冠天下之儒林運隆文明之世樂鳴正大之音鏗宮



商於翁繹調律呂於精深此釋奠大成之樂所以象聖德而感人心也若乃宿懸展聲柶橫簾立八音繁會奠重金石範荆揚之貴品礮酒瀆之瑩質貫脉絡於宣收妙始振而終詘爰有琴瑟布絲簫篪按竹笙以匏列塤惟土屬鼗鼓奏革祝故諧木序有堂上堂下之分歌有凝安同安之曲搏拊憂擊審輕重而中倫要眇舒遲益悠揚而不促迭唱和以永言盛物采以充目譜雅頌之遺芳汎淫哇之鄙俗於時殿陛清穆牲齊馨香盥薦是

嚴升降有章明靈在天來格來享被龍章其負宸嘉盈  
耳而洋洋使夫聆之者陶一身之天和覩之者詠千古  
之道域融暢精神流通血脉信乎儷美於虞廷之韶聯  
輝於清廟之瑟矣予獨因而有感焉當夫尼山降神洙  
泗闡經屹屹乎生知安行之資皇皇乎出類拔萃之英  
巍巍乎聖賢之標準顯顯乎帝王之儀刑祖述憲章而  
功著仕止久速而時行彼莘摯之自任暨惠和而夷清  
地雖躋乎至極僅一德之宜榮孰愈聖智之全美巧力

之優并與其爲小成獨奏之一樂曷若爲八音並奏之  
大成是以始終條理之取喻形於孟氏極贊而深明洪  
惟皇朝教溢八絃鼓至和於兩間浹仁澤於群生一發  
制作乎大章百獸率舞乎明廷聞管籥而同樂欣欣然  
有喜色舞干羽而格遠蕩蕩乎無能名崇儒重道祖述  
丕承允稱加封之詔式符雅樂之稱聖主龍飛經筵盛  
典中和建極海宇謚寧兼總條貫玉振金聲方將考大  
合於周禮而益隆大成樂於孔庭宜乎開億萬年之大

平也

大成殿賦

遭文明之盛世兮流聲教以彌幅員闢虎闈於辟水兮  
示彞倫之所先校庠布乎郡邑兮咸在廟而清蠲巍乎  
大成之禮殿兮嚴報本於文宣承皇后之嘉惠兮詔徽  
稱以致崇據鄒儒之微言兮盡成德之形容總條貫於  
金玉兮翕衆音之始終是曰大成兮視夷惠焉能同著  
嘉名而有自兮侔制作乎王宮大江之南曰姑孰兮面

蒼翠之三峯溪流繚乎城邑兮藹洙泗之遺風湛清波  
之半僻兮循橋門而汙汙蔚喬蔭於文檜兮發秀色於  
蒼片歲冉冉其屢更兮棟將撓而椽桷蠹澹煙蕪於黃  
昏兮恐佳期之不吾遇苟作興之有俟兮亦何恨乎遲  
暮思美人而忽見兮羗邂逅於南土駕五馬之翩翩兮  
載雲旌而容與指泮水以弭節兮蹇將覲夫靈宇東階  
兮肅升酌芳馨兮薦誠華宸塵兮袞龍翳中庭淒兮綠  
草生澹觀者兮忘情獨俟心兮靡寧謂天地之廓大兮

惟聖道其服參帝乘龍以撫運兮儒化罔間於朔南宜  
崇構以宅尊兮夫豈卑圖之所堪歲月逝而益圯兮將  
承宣之我慚萃縉紳以詢兮恢新制而經營協靈辰以  
遷主兮命梓人使效能擢良材於鄧林兮輦巨石於巖  
扃百工續紛以雲集兮隱斤斧之轟轟察屬協心以贊承  
兮曾不日而告成陰殿岬其山起兮象紫微之法宮旅  
楹植立而絢丹兮飛梁駕乎長虹朱甍采楠翼其如翬  
兮仰之高而彌崇信乎不可階而升兮夫何岌業而從

龍標木蘭而楣辛夷兮煥玉題與金鋪鏤蒼珉以爲礎  
兮削文杏以爲櫺啟寬平於赤墀兮納光景於綺疏碧  
參差其萬瓦兮躍龍鱗於天衢其勢出類而拔萃兮蓋  
將與造物而爲徒溘埃風兮排雲類特立兮無群干元  
氣兮緼縕類太和兮萃於一身赫奕兮輝煌猶髣髴兮  
文章倏雲譎而波詭兮象神化之無方具陰陽之闔闢  
兮與日月其齊光晨燎設兮獻殽醑安神居兮啟瑤戶  
皇剡剡兮揚靈率雲霓兮來御肅上公兮列侑被赤紱

兮自天而下心悒鬱而未舒兮睠焉不能舍也位門廉  
以協制兮建雄宏之廈也圭冕秩於東西兮挹道德之  
遺芳玉綵彰施於五色兮粲繡繪於衣裳列星布乎朱  
扉兮爛昭昭其未央士之誠敬有所瞻兮儼素王之洋  
洋重曰春秋紛其多故兮傷周綱之久陵嘉尼山之毓  
靈兮胡唐虞之弗興環遠轍以振鐸兮慨無人乎我聆  
陪祥麟於魯郊兮淚浪浪其忽零明王不作孰宗予兮  
歸闡教於遺經開世道之隆平兮示人主之儀刑惟熙



朝之累洽兮躡漢唐而軼三代恢帝德之如天兮鼓皇  
風於無外建人極以爲標準兮孰若夫子事功之尤大  
生民以來未有斯盛兮亦何啻乎群山之宗岱宜悉心  
以興學兮知化原之有在峙壯觀乎江表兮伊斯文之  
有賴事畢兮功深丹堊煥兮鷄林登俎籥兮奏八音吉  
日上丁兮神所歆嚴齋宮兮集衿佩描絃誦兮游六藝  
雲飛騰兮雨滂沛漸教澤兮被萬世詎曰孔子之道集  
大成兮新廟奕奕揭鴻名兮厥高造天鬱崢嶸兮龍章

當陽儼穆清兮邦之具瞻侯所營兮億載文運日月其  
明兮

孔廟賦 并序

至正四年朝議以六事課守令增興學之目遴銓時望  
爲民師帥由是西河高侯子明以才被選明年守太平  
始視事朝服謁先聖廟惟時殿庭弗葺廡弊門逼從祀  
位置未合禮度而規制隘狹髹繪昏翳懼弗稱國家致  
崇極之意乃建議改作徵學田積逋購材鳩工躬自董

督指畫匠石常臨視終日靡憚勞悴穹祇贊役冬無陰  
寒遂復開廣基址大興棟宇塑像嚴華備王宮之制其  
勢倍徙疇昔稱江淮之冠矣自侯理郡善政存施而是  
舉尤偉特蔚爲斯文盛事蓋圖畫厥職不負委任視黃  
霸教化穎川文翁建學於蜀同一轍焉昔者泮水之詩  
頌美魯僖矧茲新廟落成宜有贊述輒譔孔廟賦用紀  
成績昭示無窮雖不敢追媿作者亦古詩之流也賦曰  
天昌文運地獻靈基奠素王之奧居闕清廟之弘規法

紫宮乎北極抗陽位乎南離美成功於不日重報本於  
明時斯蓋廓乎千古之偪陋聳一邦之崛竒者也嗟惟  
姑孰開壤江東溪流揚洙泗之波泮林藹鄒魯之風况  
當車書之既同校庠之是崇煥經籍其牖民麗日月於  
層空詔大成之徽稱仰垂範之玄功匪夫華構巍雄如  
雲而翔如山而隆曷足以尊帝王之師表道德之宗工  
夫何墮瓦蘚蝕衮繡塵凝矩度失稽位序無徵玩歲因  
仍廢不遑興丹虹逝兮梁木壞金雀去兮空觚稜斜持

兮旁承岌岌兮難勝目爲駭視心爲惕兢苟非神物之  
呵衛明靈之倚憑亦將靡然而撓頽然而陵矣物因蠱  
而加飾事遇終而始成洵美高侯受命天子洒御墨於  
金屏頒宸恩於玉璽剖符內京守土南紀振榮光於兩  
輶撫淳俗於千里肇當蒞政之期首嚴告至之禮乃盥  
東榮乃服深紫瞻堂廡之隘荒省疚懷而不已於是會  
僚屬詢賢儒考群策恢雄圖緡帑久虛粟廩無儲發號  
屬邑勤徵歲逋富若川委捷若神輸協良卜吉定方辨

隅授全模於梓匠遶巨木於林虞剗雲根於瑩窟範挺  
埴於洪壚霏屑噴而瓊霏舞大冶躍而金煙噓絕龍瓢  
之靈雨輾烏輪於天衢斧斤翩翩繩墨綿綿矯枉而直  
削腐而堅曉鍾雲合晝杵雷填勞者忘疲赴者忘旋俄  
而祕殿傑聳穹址承甃飛梁奮蜺剛巉蹲獸欒櫨複結  
枌椽騰湊丹楹列乎瓌材采桶揭乎纖繡怒螭掀吻於  
危覺翔龍矯首於重雷芝栢藻稅之巧繪山采荷枿之  
錯鏤俯深坤於懸絕突中天而欲驟級層階於東西拱

脩廊於左右，寨雕簷之雲翼，碧瓦燦乎煙鱗，瑣窗納景，霞鉞璘霽，中唐巨砥，方墀琢珉，風無纖塵，雨無微津，流紅光於晨曦，颺翠氣於晴旻，啟靈星於黃道，棲列宿於朱閣，視鑊之庖，設麗牲之碑，存侯乃安，靈薦醴士，類駮奔有赫，宣尼負宸，宅尊申申，天天有燕居之儀，閭閻侃侃，若在朝之容，建華旒以垂纒，端大圭而昂顛，享以上丁衣冠，肅恭遵俎，旣旅，疊爵斯崇，載鏗鍾鼓，虞業維樅，拊以琴瑟，間以笙鏞，上公配食，傳道得宗，列速肖之群。

賢秩諸儒其追並像設孔嚴威儀俱盛絢采色之彰施  
爛絃璋其輝映彼蘭陵之性惡莽大夫之符命宜同削  
於舒雋愧江都之醇正偉營濂之毓靈指無極於冥徑  
豫焉而顏洛焉而孟間挺邵張庸奴馬鄭我徽文之紹  
統參休光於先聖咸侑祀乎明庭啟衆心之虔敬爾其  
繚垣四周澄波半壁杏壇翡翠片臯森碧跨蒼虹於橋  
門曳文綃於衛戟登其堂者恍聞金石絲竹之音踰其  
闕者洞見黼黻珩璜之飾文風振乎草木教澤被乎井



邑青山興而鼓舞采江迴而蕩瀟乾坤交泰而絀緼氓  
庶環觀而悅懌若是者豈非侯之力耶賦未既乃有鴻  
生英流方領圓袂自賓階升周旋就位捧手而問曰方  
今明主御極登三邁五思皇多士同符乎周文表章六  
經追蹤於漢武聲名文物充溢寰宇務菁莪之育才摯  
斯世於隆古家塾黨庠之相望春誦夏絃之畢舉故建  
官以闡教豐庖而具羞先生詫宮室之壯麗窮葩藻之  
雕鏤未聞發揮乎大道不幾馳騁於末流請爲我抽其

秘而啓其幽遂喻之曰子來前藏脩游息素有其地苟  
廟貌之弗嚴恐禮典之將替今而進德有堂尊經有閣  
齋廬爰葺圖書攸託導以窮理治身之功勛以尊主庇  
民之學使來游之彥鼓篋之徒遵義途而步武擴仁宅  
而安居翺翔禮樂之藪饜飫雅頌之腴考夏商之忠質  
嘉唐虞之都俞犧卦明乎消長麟史寓乎褒誅稽漆書  
之科斗別芸編之蠹魚玩文詞於游夏探道奧於程朱  
掃荏列申韓之弊止馬班曄壽之誣是知作新教化之

原以副所任者舍侯其誰乎問者語塞降階欲辭復授  
之以詩曰

彤靈彤宇高侯所營流離汗漫輝奕崢嶸於皇文宣集  
厥大成憲度百王祀事孔明春秋戰國聖賢道晦晦於  
一時光於萬代日月爾矇雷霆爾聳宜此報功制盛王  
宮配食維賢乃侯乃公牲膾而充犧象有崇升歌進祝  
肸鬯豐融高侯曰嘻訓女髦士我新是役爾立乃志麗  
澤講習尚勉毋墜聞命欣躍敢負侯意既崇仞墻亦浚

清沼蔭以嘉樹被以蒼藻洋洋文魚躍躍飛鳥涵翔上  
下於樂至道巍兮赫兮禎祥集兮侯之德兮垂無極兮

栢山賦

繁昌監縣壽卿號曰栢山爲作賦曰

有歲寒子出自新甫之境秩重蒼官之封持翠節驂青  
龍拂輕霄凌剛風擢脩標之磊砢發清韻之玲瓏忽與  
谷棲高士會於縹渺之墟蒼蔚之叢高士氣象巖巖宇  
度徑徑仰之彌崇即之靡庸納煙霏於雅抱貯春霍於

魏甯是二客者勢相埒趣相同方期互爲資蓋幸天假  
之竒逢谷棲高士顧歲寒子曰嚮焉慕君久矣乃今覩  
喬才於邱壑託厚蔭於忻懔願聞挺特之槩以攄子之  
悰豁予之蒙不亦可乎歲寒子曰唯唯吾嘗傑立殷社  
寄神明之蹤危峙蜀祠揭宰輔之忠堅剛金石之幹大  
矯蛟螭之容鬱溜雨之蒼皮竦撐雲之直躬鼓蕭籟兮  
紆婉翳車蓋兮青葱爾其霜鏖白曉雪酷玄冬萬木既  
脫千林告空吾乃鶴骨增癯虬髯奮雄葉森翠羽枝翹

碧銅結芳鄰於左紐之檜締交盟於錯節之松悲梧桐  
之早綠咲桃杏之春紅後凋興歎於丘父守義誓舟於  
衛共翔烏肅臺憲之地棲鸞表孝子之忠彼咲餌之仙  
翁悟心之禪宗亦恃此而爲功先生胡不於茲而研窮  
高士謝曰偉哉予將語子以飛巒複嶂之勝麗巨崖列  
岫之龍旋起鴻濛摩穹窿乍昂乍俯或橫或縱形高厚  
之德溥發育之公蘊神光於寶藏浮積翠於靈宮玉筍  
流彩金屏暈彤壁立萬仞根延八鴻雷震其下遂養物

之盈豐澤通其上象受人之虛冲君子體之以安所止  
仁者樂之以類而從若夫盤羊腸兮百折突鰲脊兮三  
峯綴二華之齒齒削五老之芙蓉是特餘秀所衍猶爲  
世之壯觀子亦嘗聞其始終乎二客談辨未已時有襄  
邑主人來自西北之要衝躡飛鳧吐長虹朱衣墨綬綠  
鬢方瞳是嘗曳王門之素裾瞻天陛之青楓職封疆之  
字牧遂弭節於江之東思以致鳴琴之治成製錦之工  
踵避蝗之卓茂倣馴雉之魯恭於是進二客而告之曰

柏兮貫四時而不改山兮亘萬古而常隆冰柯偃蹇匪  
山曷鍾石骨巉巖匪柏斯童吾當兼其有而酌其中負  
暢茂之資寄崇高之所質雖異兮吾能通厲貞勁之操  
稟靜直之性道雖異兮吾能融益將培千尋之材登棟  
梁於廊廟出膚寸之雲沛霖雨於龐洪固宜效扶傾之  
力聳具瞻之勢妙即物而擴充布清陰於四野蒸祥氣  
於九重豈比培嶁之設樵蘇之供語未既二客洒然有  
解如夢而寤如贖而聰相與觴柏葉之酒歌嵩高之詩



以爲主人壽鵠歡意之和濃請以二者而歸美表令譽  
之泯泯遂乃操觚紀事抽藻思於雕蟲

天爵賦

赫上帝之有命賦良貴於心官全衆美而光榮超萬物  
而尊安蓋是爵得於天之所賜何假分茅而胙土班瑞  
而錫鞶也維人有心主宰一身克具天理故曰天君當  
其大化渾淪冲氣絪縕質凝胚腴靈秀爲人帝令誕敷  
付以性真上帝若曰咨爾心官聰聰誥戒天地生物元

德至大全體爲仁妙用爲愛畀汝斯爵惻隱爰在服此  
寵嘉力行無怠制事之宜其理爲義應酬裁度發彊剛  
毅畀汝斯爵羞惡所繫申服嚴訓擴充必至維爾心官  
朕所簡閱尚其毋貳臨女昭晰行之以禮粲然有節文  
之詳明之以智截然有是非之別既降衷而不遺當秉  
彛而對越然而與是德者天之道實其德者人之功盡  
已而忠則仁義實蘊於其中循物而信則仁義實用於  
無窮樂夫善而不倦曾無間於始終茲皆天爵可慕可

從咨爾心官以思爲職代天作工爲民立極敬受爾爵  
其永無斃於是尊居靈臺光闕泰宇端莊整肅臨蒞而  
處以方寸爲所封之土以誠信爲所佩之組耳目之司  
有其統筋骸之束有其主維屏維翰嚴禦欲之雄藩如  
圭如璧瑩真純之奧府遂乃極高明而爲堂蹈中正而  
爲塗觀艮象以行庭銜巽風以乘車施廣譽而代繡積  
太和而成厨醉以道德之醇飫以義理之腴袞衣赤紱  
未足爲重高牙大纛何足爲殊凡君臣父子之有倫隆

殺等級之異宜揭綱常於萬世示法則於羣黎予以爲  
邦家之光予以立太平之基則又皆於出於斯也嗚呼  
時降風移人爵是炫趙孟斯貴趙孟能賤枉已求合浮  
雲歆羨昧天爵之當脩宜鄒孟氏感於世變也系曰皇  
天無私兮賦德在躬彝倫咸備兮委任寔隆匪軒冕而  
自榮兮不品秩而能崇紛吾既有此內美兮守而不能  
舍也誓忠貞以自許兮庶幾因時而待賈也

原闕



詞

水調歌頭 九首

送汪教授

都城柳絲綠曾跨錦驄遊玉堂紫薇花發不聽故人留  
却憶江東雲樹薄采浙西芹藻壇冷亦風流移榻謝山  
下菡萏碧波浮 煮茶壚題詩筆友書樓瀟瀟官舍如  
此踈鬢不勝秋教雨潤流名郡愛日晴烘歸路未許久  
林邨回首五雲裏鳴玉鳳池頭

送宗文山長孔子充秩滿

伏以去聖人十七百載派演平陽貢

禮部二十八名榜崇江浙遂承省檄來長儒庠恭惟子充山長省元雲漢爲章風霆示教觀光鳳闕美形容而頌成功講道驚湖柳說怪而暢皇極溪山鼓舞笙簧趨踏振泗水之遺音宗考亭之正學式欣采藻已報及瓜三年有成每取法於白鹿洞萬里而上行待詔於金馬門乃爲水調之歌以致雲程之祝

東魯聖人後流派浙江東一家叔姪兄弟取雋棘園中

鴈蕩秀分靈嶂蟾闌香熏老桂文燄爛摩空講鼓震鉛

早戶屨謁儒風一角麟千里馬九和弓人材超偉如

此道出紫陽翁正擬洪鐘待叩便跨征鞍歸去多士誦  
成功再踏玉京路射策大明宮

送天門山長馬玉相

江上兩峯立門戶自天開香芹翠繞精舍暢望美人來  
麟鳳洲中仙骨龍虎榜中文物絳帳育英才椽筆泚銀  
浪澎湃走風雷錦盃機冰作鑑玉無埃咲談馳騁今  
古况是舊經魁培植三年盛業脩舉前時曠典回首祀  
離盃老桂吐清馥飛步上瑤臺



贈王義菴

先生乃儒者有道出義黃袖將攀桂名手種作杏林芳  
江月瓊瑤萬頃山雪瓊瑤一色開戶挹寒光清氣滿胸  
臆何況有奇方 鶴凌雲鵬擊水鳳鳴陽平生濟物心  
在隨寓寄行藏丹鼎芙蓉紫艷寶杵芝苓玉屑豎子避  
膏肓神聖可醫國功奏十全良

贈醫官徐齊山

柯山倚天碧秀聳浙東南惟公與山齊德結屋對巉巖

門外紫芝瑤草窗下丹爐玉杵元氣此鍾含藥鏡發靈  
彩金匱啟玄緘 鳳凰臺龍虎地駐行驂佳聲飛滿當  
路羶冷自能諳手握回生大造心悟成仙秘訣神效過  
蘇耽雲外鶴書至衣袂染柔藍

贈臺醫張氏

良醫比良相活物是奇功乾坤萬古生意收入藥囊中  
屋上石城雲樹砌下秦淮烟浪掩映杏花紅仲景有家  
學照耀大江東 悟金丹傳寶訣契參同一方共仰司

命臺閣譽何崇  
談咲香生蘭室  
指顧春回茅舍  
沉痾掃  
除空行矣  
展高志壽域  
藹仁風

秋興

秋高興何遠  
爽氣掬星河  
雨晴山勢飛  
動樓外鴈來多  
丹桂香凝幕  
府銀燭光搖  
青瑣試問夜  
如何天地大無  
外老子儘婆娑  
寫兵機脩馬  
政詠鏡歌西  
風莫添華  
髮壯志未消  
磨眼見帝都  
龍虎人似仙  
洲麟鳳留我  
共鑿坡把酒  
暫舒嘯明月  
借金波

言懷

天地一開闢日月幾東西古今氣化無息萬物豈能齊  
春樹珍禽韻巧秋水紅鱗影捷松石伴幽棲佳景與心  
會得句或無題碧油幢蒼玉佩紫金泥明時文武勲  
業我亦棄鋤犁志在螭頭直筆道在床頭古易奏策濟  
群黎野鶴忽飛到清夢繞山溪

偶述

皇天萬物祖生氣本冲和忍令古今天下治少亂常多

血濺中原戎馬煙起長江檣櫓滄海沸鯨波割據十三  
載無處不干戈 問皇天天不語意如何幾多佳麗都  
邑煙草莽平坡苔鎖河邊白骨月照閨中嫠婦赤子困  
沉痾天運必有在早聽大風歌

水龍吟 三首

壽青溪王者

先生文武長才五城三島頻來去絳霄繞室紫烟煉鼎  
青雲得路銅狄摩挲琳書披閱玉京游步想乘牛函谷

飛鳧鄴郡今與古同高趣 一曲青溪迴護自逍遙藥  
宮深處黃眉洗髓洪崖拍手赤松爲侶桃實千年芝莖  
三秀喜迎初度任九霞觴滿七星車轉看仙童舞

送李國用赴宗文山長

伏以天門爲太白游詠之山宗英繼出鉛  
山乃文公過化之地精舍爰興闡教得人  
視今猶古恭惟國用山長李君瑞芝三秀  
威鳳九苞人才如在治之金陶鎔有待經

籍警行天之日垂示益明神悟正傳力排  
異說往應鱣堂之瑞將弘鹿洞之規車同  
軌書同文行同倫世幸逢於一統家有塾  
黨有庠術有序化大洽於羣心遂賦水龍  
之吟用祝溟鵬之舉

碧天雙岫門開澄瀾幽竹環仙境長庚孕秀明河借潤  
孤蟾爭炯疊嶂樓前桐君山下幾年馳騁說芹池雨化  
杏壇春滿綉卷富青衿整桑柘鶯湖佳景對清樽且

忘瓊冷紫陽磬效春雷響震秋蟲聲靜老屋無塵短檠  
聰雪寒爐烹茗看回頭捧得詔黃香墨出中書省

送人出使

酒闌和夢登程秋陰壓得征鞍重似華峯霜隼禹門雷  
鯉丹山雲鳳滴露松窗煮泉木鼎漉冰齋甕向金閨高  
步羽林雄論便寫就中興頌主將遠提兵衆細評量  
古人言動太公韜畧蕭何圖籍孔明擒縱茗莢吹香芝  
英產秀荔支脩貢更此行妙處訪求賢俊助明時用



木蘭花慢

送教授汪處謙

羨蓮花博士珠照乘，  
驛連城、更經筵生香。  
詩筒寄興，鐸揚聲，  
故家老成。文物便鑿坡寶炬，  
被光榮、來勺姑溪。  
秋水雅懷一樣，  
澄清。芹宮燈火，  
月華明時，主校文衡。  
向玉潔堂前詠歸亭上，  
飛動歡情，堪憐盍簪無幾。  
又梅邊歸路，  
馬蹄輕，此去朝天有日。  
御爐烟裊，瑤京

大江東去

送段伯文赴太平帥府經歷

紫薇香冷着風生  
銀翰月飾朱箔面  
有長淮清潤氣培  
以老成才學  
蒞蒞波澄瓊花霧  
歛夢跨揚州鶴  
案塵不染聲華  
飛動臺閣  
天上妙選仙官  
牙緋息重  
婉畫清  
油幕坐對江山  
雄麗處依舊  
太平城郭  
令肅貌貅  
歡騰  
雞犬千里  
蘇民瘼  
雲間路闊  
一樽試爲君酌

金縷曲

夜宿省中有懷賀父孚

庭樹秋聲冷夜迢迢漏傳銀箭月明華省最惜稽山無  
賀老短燭照人孤影做好夢又還驚醒風透圍屏青綾  
薄且披衣立傍梧桐井兵衛肅畫廊靜 江湖聚散如  
萍梗咲談間雲霄滿足一鞭馳騁萬壑水晶天不夜人  
在玉晨仙境說近日四郊無警言兵後遺民歸田里漸桑  
麻綠映鵝湖嶺須再見好光景

敬次上所賦漁家傲

駐馬坡前觀虎踞金陵都會與龍處共沐普天恩似雨

芳草渡江邊營壘人家住  
御柳映街籠翠霧錦衣銀  
甲青驄馭文武百官班  
遙鷺呼好侶軍門獻納勤來去

西江月

六月二十日初暑書事

久雨相連伏日太陽初變  
炎天綠槐繞屋未鳴蟬  
浴罷新携團扇  
子病親臨藥竈童歸  
愁問木田藤床移近  
水亭邊臥看星河西轉

大常引 六首

壬寅季夏即事

江城六月雨聲寒  
河漢倒雲端  
白浪渺懷山  
笑門巷撐  
船往還  
龍吟水面魚游砌  
上田野勢漫漫  
稼穡本艱  
難問何事天公太慳

晚景

透雲魚尾縷  
晴紅縹渺水晶宮  
人在小橋東  
看絲柳輕  
搖晚風  
斷霞飛練遠  
煙凝紫山勢  
活如龍浴罷倚長  
松愛歸鳥孤飛半空

連陰書事

濕雲宿樹暗樓前  
潮上綠苔磚  
煙雨滿江天  
似畫出王維  
朝川  
蔓牆蟲篆草池蛙鼓飛溜  
眙高眠海閣晚風顛  
最穩是溪翁釣船

偶述

對人無語叙寒暄  
多病似文園  
學未造淵源  
空寫到千言  
萬言  
長江雨歇高天露  
下星繞紫微垣  
山友結馴猿  
儘占取清風滿軒


書巢

一巢結在萬書叢營葺半生功稽古豁然通任蹤迹幽  
棲此中 鶴居松頂龜藏蓮葉意思亦相同牖戶敞玲  
瓏是理窟包涵太空

蒼芸細軸幾周遭身世占清高風雨不飄搖最相稱先  
生一瓢 鯤鵬海闊鷓鴣枝上各自遂逍遙經史雋芳  
膏似養翮翱翔九霄

松風

怪龍湧起半天潮，驚破月明宵。  
爽籟自然調，來慰藉山中寂寥。  
瑤琴罷鼓，茶鐺息沸，一片奏仙韶。  
兩耳洗煩囂，且莫效當時棄瓢。





陶學士集卷十

欽定四庫全書

集部

陶學士集卷十二

詳校官中書臣呂光復

中書臣劉源溥覆勘

覆校官中書臣朱鈞

校對官中書臣吳俊

謄錄監生臣胡觀瀾

謄錄監生臣董邦本

欽定四庫全書

陶學士集卷十一

明陶安撰

序

送劉仲彬序

天下之學原於理理然後有氣氣然後有數氣則陰陽  
五行乎可推數則脩短吉凶乎可測孰主宰是理實具  
焉蓋必有先天地而生後天地而存者矣儒者為學務  
以理勝猶元氣也由儒明乎技術推氣測數洞徹竒奧

猶元氣流行而生成於物也可以與是者其劉仲彬乎  
仲彬中山人居姑塾別墅繙閱經傳該貫今古詞藻燦  
然即人始生歲月日辰辨五行生勝衰王轆轄參綜條  
疏節解其論玄博精暢於窮達壽夭禍福刻期取應又  
能以七政四餘度分垣布雖萬殊千變判別無爽觀其  
為術若火之燭物著龜之前知權衡之定輕重仲彬藏  
脩于家唯儒素是務未嘗從師以學術而所能若是凡  
老涉星歷子平氏書給食江湖業稱專門者莫敢與較

能貴人文士競趨而樂叩焉則夫儒而明術者信有異乎常矣哉今將遠遊四方告別於余余意人受形質固皆稟於氣圓於數莫有能逃焉者也君子貴窮理以立命而已自星命之術遍天下遂乃諉之氣數鮮克究力於人事强者萌僥倖之心懦者惰脩為之志靡然成風但曰我有命焉若是則聖人脩道立教可以無也苟窮理立命以己之天制天之天進退得喪悉安所遇豈不卓然傑出於天地之間哉仲彬儒者知此審矣斯行也

其為我以是驗諸人它日歸吾將舉而問焉聊以卜斯  
世果有窮理立命之人也

送毛公禮序

古之君子出其才智經濟事物風節聞於人勲業光於  
朝設施皆得其道者素定於未達之時也當其潛晦積  
學累德舍宴安甘勞苦或耕牧田野或羈旅江湖父其  
師兄其友蒐羅羣善用廣己能下至閭閻艱難米鹽細  
故罔不繫心是以閱之熟而慮之深知之詳而守之堅

也其或深居情逸獨學寡聞欲冀用於世者第以微寵  
為志爾幸有美其蘊植鮮克更涉民務不幸早貴臨事  
處置未盡合宜然則立身應務固亦難哉許昌毛公禮  
家潁水上杜門稽古不妄言動於詩易微旨默有會悟  
為文豐不近冗華不損質弗耀露所長人莫之識也乃  
嘆曰今天下同文南北異才角立相望曷若外適擇其  
尤而薰炙焉苟僻處狃常揆所見聞能幾何哉於是游  
汴洛歷汝蔡自以為未足乃渡淮涉江南至于吳楚去

年冬來姑孰郡侯見而賢之俾館穀學宮親師取友誦  
覽脩纂澗涵暢行功十它人弗可量也久乃辭去將歸  
許昌余頃居京師獲交中原之士視決宗科陞顯級者  
較其藝能非皆右於公禮也若公禮之志固將行道澤  
物而踐其所學此所以間關千里衣布素飯脫粟寧勤  
勩而不悔者意有在也豈非素定於未達者哉其所謂  
閱之熟而慮之深知之詳而守之堅者哉

送金梅窓序



九州之地皆聖人所別無偏重也九州之人皆王者所  
治無偏私也地有南北猶天有陰陽時有冬夏然人心  
之理不隨地而異湯立賢無方孔子稱南方之強為君  
子尚可以南北第其人哉當國初之混一也一視同仁  
南士擢居顯爵才烈彰聞相望于位邇者三四十年始  
棄逐不用日銷月鑠浸以弗振載名銓書者寂無幾焉  
夫中原疆域方九千里古今莫可增損若遼陽甘肅雲  
南女真高麗舉非九州之地西則巴蜀又出九千里外

今其人皆得與中原等唯荆揚貢賦極饒文物極盛而  
朝廷鄙其人當夫奄有萬方曾何彼此之限奚荆揚獨  
可鄙歟將產其地者盡非可用之才歟舉其尤著則吳  
季子言游澹臺滅明之賢屈大夫宋玉陶靖節歐陽脩  
曾鞏之文王羲之虞世南褚遂良歐陽詢蔡襄之書謝  
安張九齡陸贄范仲淹趙抃之功業周濂溪李延平朱  
晦菴張南軒呂東萊黃勉齋蔡九峯真西山之理學其  
他魏黜大節高風卓藝浩乎莫能勝紀若是者果皆可

鄙歎况江浙為天下理學之統會而新安者又江浙理學之統會也自晦菴既出名儒繼興窮演著述陽輝而玉粹列聖之心羣籍之道洞無遺蘊挈四海為洙泗者以新安之書迭出旁流不可忘所自也新安老儒有以梅窓稱於時者姓金氏字維清居京師十五年元老鉅卿待遇有禮坐以南籍竟不獲登諸朝聯以太史院薦始受命教授太平陰陽學梅窓讀書博識守其鄉先生之理緒為文有渾厚風尤深於詩寓意悠婉凡星緯地

理占筮諸家之學靡不融暢使貫中土者得其一長皆可名世以取顯榮乃獨栖遲隱忍弗辭卑官甘處南人之分焉嗚呼君子所恃以不朽者有德焉爾用不用命也梅憲達命之理德以制之雖不用乎何尤苟吾不朽者存縱不用於一時將見重於後世較其所得孰為多乎於其謝職餽之以文使人知有梅憲之賢而不遇也

送劉仲脩遠遊序

今南北混一造千萬里之遠若近踰戶闕故行者樂而

居者不憂也彼商街萃其貨力操舟犯乎湍深驅車轆  
乎險峻卒抵於遐陬外徼往來率以為常僅營銖寸之  
利而已若士之遊於南北志將有所為也遊而學焉可  
以成其德遊而仕焉可以行其道不資貨力而無湍險  
之勞所獲又非止銖寸之利惡能自己乎春秋戰國天  
下裂據非有今之混一而聖賢者亦事於遊顏淵過匡  
季路問津欲成其德者也孔子歷聘孟子轍環欲行其  
道者也遊之云乎馳騫汗漫云乎哉吾自慶生逢盛時

四海如家每思經涉南北周覽疆域之廣文獻之美而  
杜門窮經願莫之遂乃獨驚喜仲脩之遊也仲脩謂予  
言族本縉紳思繼其業我不敢不學也家有父母思養  
以祿我不可不仕也歲月荏苒年漸壯矣末由振拔恒  
悒鬱於吾心非碩儒宿師之依莫克遂於學非名卿達  
官之擢莫克華於仕苟困處閭巷將無所倚成決意茲  
往必有得而歸也予聞其言而有告焉宇宙間至貴者  
理而已理自天出力不能以強致謀不能以幸取博而

窮之於物約而會之於心心平意定至貴者悉備乎我  
積忠信為學之本謹言行為仕之基求之已而有餘復  
何俟於它求也予行過通都鉅邑擇其人而質之其有  
戾於予言乎否則駭目而悸神者山嶽海瀆之靈竒焉  
城郭溝隍之高深焉器服珍寶之華侈焉固能極視聽  
之娛恢翰墨之氣其於學與仕所資何如也仲脩謝曰  
先生命我矣遂買酒登溪樓上宴別甚歡贈斯言以壯  
其遊

送周彥升歸宛陵序

有可施之具由仕而後顯其美遭世承平志畧之士用  
祿代耕振奮以自拔然出處義存窮達命賦或詭遇以  
要時余素難其人今始得於彥升焉初彥升父周君及  
其婦翁燕君締交周沒燕受託壻彥升於家余與燕之  
子叔義相厚雖識彥升不數數會遇頃同徐仲善來踵  
余門獲接其言論復與劉仲彬見過察其性情甚矣類  
吾叔義也余惜彥升有其具不由仕以顯其美因謂之



曰良材之桐困於薪矣太阿寶器晦蝕於土非聲激爨  
下氣見斗間以驚動觀聞惡能受知於識者表其異於  
世乎子胡不一爆其聲一吐其氣殆將有所合也彥升  
曰今世謀進者結權要援親黨氣勢凌壓取仕祿易若  
探懷袖物若是者我所無也囊金帛餽醕爭求薦達  
惟恐不躡人之先務快志於時頃若是者我所無也無  
是二者則美容辭勤奔走恒屈折於鞭輿之下逢迎謁  
請視喜怒之色以為進退苟焉一得外自侈炫若是者

我又不能也我將歸宣廬先人之居田可稼圃可蔬安  
其素分不躁求以妄圖若其乘時有為遂所志願我固  
欲之然豈敢必乎吁向吾難其人彥升果其人矣持是  
而弗變立身成名信可期也余亦知義命而能守者也  
嘉燕氏父子知人而善處也從仲善仲彬請為文以貴  
其歸云

送游景達序

士之特立於世者其品有三脩於道德者上也發於事

業者次也著於言辭者又其次也仁義禮樂養其性孝  
友忠信達於人安土而樂天足乎已無待乎外雖未及  
於事業言辭綽然有以自重道德脩之於身者然也得  
其位行其學功可以濟時澤可以被物振譽於朝廷垂  
光於竹帛則又視言辭為不暇唯隱處晦阨研經稽古  
不得施於世乃苦心殫力旁求精思一皆托之言辭顧  
豈不欲發於事業哉窮達之勢殊也金陵游景達脩纂  
考論立言於經傳憲臺以著述薦景達既敏於學知道

德不外乎一身勉而脩焉可也年甫壯未至於晦阨期  
乎事業之發亦可也勞勞焉以著述為事甘處於最次  
如使析理剖疑會其所同辨其所異為世教人心之益  
其志可謂大矣或資以求知取仕利其私圖言辭奚可  
恃乎哉然則景達宜緩其所可能勤其當務者斯可造  
乎上也於其歸因質諸言尚思繹之

送胡達卿序

國家財賦鹽利為盛民日食鹹其用至切設官以括利

莫若淮司為豐也淮壤多斥鹵瀕海煮醴之饒甲於天下北踰汝息南越江湘靡不取給歲入錢貫為萬者一萬八千朝廷倚重簡才領司事由是河南秦公出踐使職剗別宿弊號令偉赫檄姑孰郡史胡達卿為屬曹誠以利源所出宜得人以贊其政也達卿自從吏慨然有遠志不屈下以取容容觀步趨表表殊異人以顯仕期之達卿亦自信不疑也郡守魚臺賈公薦于淮司賈公嘗為兩淛鹽使與秦公才譽相望其言見信于時達卿

因是得以揚翹吐華裕國之財足民之食獻謀長貳儻  
可減額損直少紓東南凋瘵之力以慰衆望庶不負於  
斯行也予竒達卿氣之揚年之盛果能如其所志也重  
賈公知人之明秦公任人之公也形諸文以為贈

送游教諭序

官以教為名師道之所存也自教不領於司徒後世臨  
教州郡者鮮能盡其職况在一縣勢孤位下歎然不振  
教典乃曠師道之不立也宜矣一有以教自任不狃於

世習者豈非毅然特立君子哉上饒游起南先生任當  
塗教官其始至也學宮不治廟貌不肅無斗緡之儲乃  
規畫興理作新教條叢經傳於座右躬課諸生懇懇無  
倦弦誦之聲洋溢乎朝夕有歷千里及門者每旦望會  
多士於公堂深衣講說人莫不飫義理之味退而重自  
刮劘文風大變蓋其學粹而德厚介義利於秋毫甘貧  
淡而不厭毅然特立宜夫脩廢之易而感乎人者深也  
舊嘗錄徽學士子稱譽不衰繼領薦衆方冀其大用而

猶教於百里之地尚幸師道獨存學者有所仰式也使  
其登成均教大郡亦率是焉而已爾秩滿而別吾黨有  
不能釋於懷故云

送趙生序

求道莫先於得師師之所在無問遠邇必以為歸苟深  
居里閭溺於宴安遷於流俗而欲學焉以求道吾未見  
其宜也中山壤地邃密風氣所聚民多富饒其讀書好  
禮者曰趙族有字宰衡者儉素自持彼其以華靡相高



膏粱饜飫之習裘馬佚游之態紛至其前宰衡一不畧於心命諸子姪執脯脩禮事嚴君仲容為之師仲容來自四明講經於益清閣弟子翕集趙族聞而慕焉名志民者宰衡子也年未弱冠笑其師說若有契於心者耳焉異其聞目焉異其見將敏於求道之不暇尚何宴安之溺而流俗之遷耶今歸予懼其方進而或止也能無言以勉其成乎擇交以慎其所趨守正以勤其所勉外之誘者拒之內之窒者廓之約其心於理焉可也率是

以往歸求而有餘師於道亦庶幾哉

送潘仲升序

士之世其家學不外慕而移其業者在今為最難蓋勢利紛華動耳目誘心志操守弗固從而變焉唯寒素靜淡處之自裕使先德不泯推所善以及於人豈不足為賢師哉潘氏在姑孰自拙逸公以行義文詞著名吾友仲升其曾孫也予所見者仲升祖若父儒雅相繼為搢紳模楷從游之士翕趨其門由拙逸至仲升凡四世皆

處師位於陳氏陳為西隴名家其子弟務學入官承潘  
之教也仲升刻苦勵學脩飭其身有祖父之風其為文  
搜竒摘奧窮盡事物之變安於憔悴專一無所移其業  
真能世其家學者諸大族爭奉厚幣欲羅致西塾仲升  
皆不就獨於陳氏聘不吝於復行也豈教澤之流者深  
使其久而不忘歟嗚呼培之厚者其發則榮伏之久者  
其飛必遠教於一鄉日以義理啟導功有學半之益涵  
泓演迤充美於中出而措諸事業視前人其有光矣於

其往也申以勸焉

送總管賈晃山序

儒者懷道藝不獨美其身務以致用於時也當其得位  
行志勲績顯于朝聲名流於世固足榮矣至於難進易  
退持守不渝致政高尚克全晚節使人嗟歎懷思贊服  
其賢斯足為尤榮者則賈公其人也公字惟貞家魚臺  
人稱為晃山先生蚤受業於孔林仕由教官辟入中書  
拜監察御史還樞密都事行省郎中兩浙都轉運使遂

以正議大夫任太平路總管太平三邑簡靜易治府廡  
雄麗公事蕭然號江東道院守土者坐鎮其上尊而不  
勞又有江山登覽之勝魚米需給之饒每朝廷優賢必  
以是郡為選主上重公宿學舊德不欲煩以劇務特授  
今官公亦愛其民俗淳晏敷宣政化千里之疆日被休  
澤有古循吏風居歲餘年未七十遽辭職為退休計佐  
貳僚屬接踵請視事弗聽者艾數十輩日候于門公亦  
不出於是士議於學農議於野商賈議於市相率俟其

出乃羣懇馬首領毋速去公慰喻而別比登舟吏民拜  
溪許猶冀少留公命舉帆順流而下羣倪聚觀於兩岸  
目送垂涕此舉在公則榮其如人心不釋何彼嗜利者  
減歲貪位造戾荷怨以去官為戚其賢否何如哉公雖  
屢登華要歷事五朝秩正三品爵祿不加於心安處澹  
素仁義忠信形諸踐履求之當代儒術致身始終完美  
者如公不多見也公歸視其桑梓必曰此吾先人之所  
居也省其松楸必曰此吾先人之所藏也然後觴酒於

耆英之社杖屨戴白婆婆以娛詩書禮樂傳之子孫是  
皆公之素願也雖然老成典刑人所敬慕論道濟物非  
公而誰必有安車帛璧遠賁林壑又豈容默而已哉

送張生序

天翼張生東平人也東平古附庸於魯俗尚禮教有洙  
泗之遺風焉賢才之盛著自往昔入元以來登政府肅  
風紀接武翰苑掌成均之教魁大廷之選者類多東平  
人勲業文章冠冕中州何其盛哉近年入仕限以資級

茂異歲貢著述之法相繼而廢科制亦輟南北士陸沈而不振雖東平亦不復如前之盛矣今以儒進者僅兩途會計於學校焉試吏於郡縣焉其職雖卑非有勢位之援資貨之挾莫由以自達窮經懷藝困乏無助者咸不得進用張生蓋其類也張乃東平任族生務學勤敏僑寄南方無祿養親謁臺憲諸公既無所遇需次太平郡史翔翔泮林執經問難剖理屬文突出儕伍後天翼而來者郡府補吏已數輩又獨不遇奉母之東吳行有



日予既不能周之以力遂贖之以言嗟乎用舍之命懸於天學問之功由於已在天者不可以力求而在己者可以自致也沈靜專毅以大其器也溫厚粹雅以達其辭也謙抑誠莊以持身而應物也循是而無失焉則仕祿之來也孰禦東平之賢才不獨專其盛於前矣其勉哉

送李景輝序

苟有以異乎衆雖深居數澤不求聞於時而聞者自求

之必其心志恬晏才業充裕待聘而起或置之爵位則利澤可以被乎世或處之賓師則善教可以淑乎人所以就者異所負者同也今賓師之職曰訓導專學校之教公卿顯宦亢勢鈞禮有廩粟之供而無官守之責故為士者未由爵位以遂其榮或由賓師以養其尊也吾邦世儒最著者為黃山李氏家學脩五經之傳由左司君之後有菊野先生竹山先生皆表表賢範學者慕之景輝紹其世業居北郭外門巷隘僻車馬謁見憧憧其途

郡侯優以禮幣羅致泮齋戶屢景從聞者咸曰李君儀  
度偉雅文詞流麗推其善以及物抑何幸哉君尤工書  
翰殘章剩藁人珍惜之持縑帛而購書者爭趨焉再期  
引退闔扉讀書于浮丘襄水間九江檄至亦有賓師之  
聘君樂其道能遠行遂沂江而邁非有以異乎衆能如  
是歟吾聞九江多大川靈山必鍾美於人當有碩茂之  
資然而長育導誘方有望於成效慎哉斯行應其所需  
而益有聞於時使其家學所及由江東而西焉則李氏

世澤光流于久也可知矣

送縣尉程宗成序

郡縣官制歷秦漢唐宋至于今其名與職沿革不同獨尉之為官代相襲而不易子真之於南昌孟德之於北部縣之置尉古矣哉夫尉也擒姦禦寇懲非禁暴雖具弓刀邏捕之煩誠得賢者專其責設施有方則疆域之內潛消不虞晏清無警匪特効力威武固所以翼善治保齊民也宗成程君來尉當塗條疏禁章風動邑境市

博者復常業肆鬻者無濫欺強梗知所畏而攘竊知所羞君嘗言尉與令簿聯銜而弗與縣事苟在所宜為當盡心而不辭其怙吝不率致之有司以詰其慝用是民重犯法刑罰稍簡君雖不侵官然縣事賴以弗冗非賢者而能之歟初宗成居黃岡慷慨負大志從名儒賢大夫游善屬文今上潛邸南遷其才徹於睿聽因脩扈從日侍燕閑及入繼大統軫念舊人優以爵賞紆金曳朱頒自特命唯宗成僅在卑秩恬然不較然昔人階是官

者每登朝行舉其略若婁師德之台輔牛僧孺之西臺  
白居易之翰林其所就何如也宗成秩滿赴京入覲黼  
扆獻納之際其必曰時政之弊為目多矣貨賄者騰達  
而德藝者困窮也貪虐者橫驕而廉潔者挫抑也民力  
乏而斂愈急吏滑滋而法不行出餘論以幸天下正賢  
者之樂為則予雖處遐僻尚可以被餘光而起敬也

送謝宗玉序

國朝重錢貨之實輕錢貨之名經費常資稅課居其一

歲入甚繁蓋在在有之設官征商其品級以稅額為差  
命服緋綠選列長流為其重錢貨之實也然以一統之  
朝其大侔天其富侔地乃與細民計利錙銖芒忽筭括  
無遺視古闕譏弗征者異故不得不輕錢貨之名外示  
賤利美意庶無貶於治體焉為人上者避嫌而輕其名  
可也世俗視其官而槩輕之不可也借曰由刑書左遷  
苟善理職猶當取瑜而棄瑕况門功廕仕必掌金穀然  
後清資華級可循以陞幸有刮豪蕩篤文學又率以事

功顯此任子之優美者而宗玉謝君亦其人也宗玉司  
稅於姑孰完飾廨舍籌會精覈謂征取寬平則人不肆  
欺衆物造集由是川運陸輦商貨睽屬外無竊入內無  
逸出稅額雖繁不勞力而盈其數先是征官賈贖爾女  
語市上君儀貌儼肅望者敬畏鬪奪博擲亦屏氣斂迹  
蓋屢肆囂諱利之所趨乃訟之所起卒致有司牒訴寡  
而易治休則考方策游意翰楮所製詞章豐縟整楚或  
席賓士談論倡酬盃酒接歡瑣瑣錢貨一不塵瀆于懷



今考滿遷秩行膺宇民之寄則何政弗舉又將躋清要  
之衢鏘鸞鼓策尋其先世軌轍而馳驅之亦在脩持所  
致所謂以事功顯者余日望於宗玉焉余既與君友又  
承教授金君請遂序以重其別

送教諭夏仲符序

古之為教慎脩持於身今之為教徇好尚於時慎夫脩  
持其學約而有倫德行文藝而止爾徇夫好尚其學煩  
而無統訓詁詞章而止爾距古滋遠善教浸微聖賢歸

趣質質將無知雖黽勉從事經傳操筆札成篇方役意  
進取為求脫貧賤之計故德行廢而文藝衰豈所教者  
乖其方學者因而失之歟處今之世雖不能免於訓詁  
詞章即訓詁以窮理因詞章以寓道反之於己表裏交  
治本末重輕之不迷明而誠焉猶庶幾乎古奈何教者  
學者莫此之由也吾嘗觀學額之廣殆無過于今學弊  
之極亦無過于今國朝增置州縣下至小邑必建學設  
官務以尊儒育才然而任教責者恒非其優為廩帑之

糜費弦誦之寂寥，旦望謁拜而登降不度也。春秋薦獻而姐籩不肅也。學為虛器，官為曠職，傳舍而已焉。借逕而已焉。吾重為學校人才之歎。每思得賢教官以望復於古仲符之諭東流也。故以是言申懇懇之告。夫環境百里，編氓萬計，居教官者導其人於善，毋徒徇時之好尚，俾皆慎其備，持必有忠信之質，懋進於聖學者，儻任有餘力，繹吾言而躬率之，其教官之賢也哉。

送張得原序

予聞高唐張氏以儒族稱重北方後或徙家于南有守道者文學鳴于湖今當塗縣幕官仲冶乃其從子也仲冶明習吏律予曰得原結髮讀書長益脩飭或勸舉吏俛首應曰非我志也蓄學不輟吾以是觀之知其為有志者矣凡力於學豈但勞誦記窮披尋炫文翰以徼利干寵貴乎志有所立自期以高遠乎爾天下之人孰無志也但人各殊志所嚮亦隨而殊矣志苟定焉嚮苟正焉將何遑弗臻何願弗遂無它由已而不由乎人雖子

不能以得於父父不能以奪諸子吾既見縣幕自儒即  
更能進於仕而又嘉得原變吏歸儒能復其先業也然  
吾有以卒子之志矣古之人才率勝於今者初非甚高  
而難及也甚勤而求乎世也不急居之以恬靜持之以  
堅確成於艱難之餘用於完實之後故其發也浩乎沛  
然而無窮若良冶之淬礪必銛而剗裁也若良農之耕  
稼必熟而斂穫也循乎是則異時大張氏者非子也耶  
子過淞見而從祖請訓焉或不異於吾言矣

送黎仲賢序

采石距郡城垂舍許膏壤豐夷憑江而出山勢沂流魏  
峙煙濤渺瀾遂限江淮之疆其形勝冠絕遠邇南北清  
美之氣會萃于茲鬱蓄久矣其地則室宇鮮華賈貨闡  
溢民物阜蕃水馬舟楫山馬亭觀以給遊覽之娛吾疑  
氣之會萃鬱蓄宜發為翹磊暢邁之才而罕見其人豈  
或潛晦俟時學充於己不待資乎外將吾偶未之見也  
及憲軺按部簡拔俊能為學官乃聞有采石之士試藝

與選喜而叩之則知其為仲賢竊因有感焉三代盛世夫井黨庠之制行民嗜脩學甚於飲食常登進賢德命以爵位不學則棄而弗用生斯時者勢不容於不學由禮義之習深勸懲之道明也後世習降道衰上無教下無學逸豫苟止循襲浸久遂以為常一有草心嚮理奮自濯磨如仲賢者出乎其間能不墮於流俗其可貴於三代之士審矣仲賢長育富家獨樂儒素居其職無廩帑出內之煩唯燭繹經傳窺聖人之藩籬躋君子之堂

與匪直美文翰而止吾意清美之氣得非發於斯人哉  
考滿余無以為仲賢贈雖然無它求也即所居之境仰  
觀山之靜重以厚其體俯視江之流通以廣其用默然  
心契而不以資遊覽之娛馴是不已惡能測其高遠耶

送燕叔義序

士當治世思欲致用科第之艱非可必取或由吏進雖  
致身異途較其學術才行同焉爾余友燕叔義英朗疏  
敏耽學善文業周易窮四書旨趣旁涉羣史百子諸家



者流記覽韞積淵涵而谷納辯議馳騁出入援據上下  
數千餘年事變治忽若近在几席嘗有志於決科矣及  
科制輟於至元今中丞夢臣張公承旨繼學王公官行  
臺俾從吏昇郡調徽理刑獄有聲調姑孰司繭絲粟米  
之征蠹止惠流摠管賈侯惟貞薦為廣東憲史科制既  
復貢士不聽吏于憲司以命士九品郡曹二考廉能者  
充它職弗與憲史之擇不下貢舉之艱叔義去科第而  
就吏行志於清要馴致膺仕視決科者均也凡識叔義

者或稱為經生或稱為文士或稱為詩人又或稱為守  
法之吏舉衆美而歸焉不啻與決科者均當有以過之  
矣夫嶺海以南去天萬里番禺之民唯知尊憚風憲其  
官聯皆朝廷遴選將必有如前三公之知己往佐幕下  
廉以厲其操誠以擴其公莊靜慎重任激揚之責風動  
荒徼則吾黨之所望也重叔義之行者合辭徵文以贈  
別是為序

送沃呼彥文序

皇朝官制廉訪司秩三品尊嚴於庶府專勸懲之柄書  
吏奉邦憲贊佐政刑宜得端潔幹達之才以舉其職肅  
一道之表儀求之於時而彥文幾乎是矣彥文始祖沃  
呼氏掌完顏國馬政貌類其君代死於遼遂啟金運及  
賞功爵其長子請讓二弟卒得均賞夫忠于君而棄其  
身念其親而先其弟危行著聞綱常有賴軒裳奕葉後  
金彌顯大父從淮安王征伐以勞拜官五牧州郡父典  
教廣信退隱高尚允彥時登進士第彥文自少勵學侍

父在信時太守秦侯元之拔為郡史以其才有足用也  
調姑孰賈侯惟貞守郡察其操守薦陞書吏余與彥文  
雅交每相見輒劇談歡洽坐終日僑舍空寂無贏餘之  
資今赴湖南憲司則勸懲之柄由人而加重又可幸彼  
之得吏而憾余之失友也歲晚告別徵余贈言余惟彥  
文承世家之休光沐儒林之膏潤置身清要益充令德  
浸致顯達光紹前烈勿以遠役為嫌也遂申言以勸其  
行



陶學士集卷十一